



Minggu, 17 September 2023
Ogen : Perb. Rasul 16:40



Nikapken Rumah



Meriah kal adi reh kalak ertemue ku rumahta. Menurut kalak Jahudi, tamu emekap persuruhan Tuhan emaka sikap ia ngalo-ngalo temue, desken sekalak raja si i hidangi pangan ntabeh ras perbahanen si mehulina kal. Sebab temue e maba pasu-pasu ku jabu si idahina. PJJ ras PA-PA bas gerejanta semal ilakoken i bas jabu-jabu perpulungen. Si menarik tep-tep perpulungen si mada jabu erusaha ngalo-ngalo si reh alu persikapan si tuhu-tuhu sikap. Piah tempa-tempa jadi ikuten, adi rumah teman man, maka rumahta pe arus man. Jenari kinata si lit, lit ka anggota perpulungen e la nggit ngaloken kalak pulung ku rumahna, alasan ekonomi la tersikapken pangan ntabeh, anak kitik denga mesera ngaturken jabu, bagepe alasen sideban. Si jadi renungenta, uga nge persikapan jabu si atan iadep-adepen Dibata, gelah i bas perpulungen i rumahta sialoken min upah bas Dibata nari?

Lidia sekalak diberu si la Jahudi si pemenana tek man Tuhan, jera dingen nggit iperidiken Paulus. Lidia kalak si metemue, mekacar, mehuli ukurna ras nggit nampati dahin pebelangken Berita Si Meriah. Meriah pe ukurna ngaloken Rasul Paulus ras Silas kesilang bas rumahna.

Erlajar arah biak Lidia ras kai perbahanenna, si idah maka labo kepe kai isi rumah e si perlu ipesikap i bas ngalo-ngalo Tuhan nta pe kemahenna. Rumah e terang ras hangat adi lit Kesah Si Badia i je erdahin. Rumah si kerina anggota jabu erkemalangen man Tuhan, dingen radu sitatangen em singenana ateNa. I bas cirem, meriah ukur ngalo-ngalo Dibata em persikapan si tuhu-tuhu.

➤ Pusuh si mecihö, dem kemalamen ate emkap Rumah man Tuhan